

**BOSNA I HERCEGOVINA  
FEDERACIJA BOSNE I HERCEGOVINE  
BOSANSKO-PODRINJSKI KANTON GORAŽDE  
V L A D A**

**ZAKON O VODAMA  
BOSANSKO-PODRINJSKOG KANTONA  
GORAŽDE**

**Nosilac izrade:  
Ministarstvo za privredu BPK-a Goražde**

**Goražde, april 2010. godine**

Na osnovu poglavlja IV odjeljak A člana 23., a u vezi sa članom 17. stav 1. tačka h) i članom 18. Ustava Bosansko-podrinjskog kantona Goražde ("Službene novine Bosansko - podrinjskog kantona Goražde", broj: 8/98, 10/00 i 5/03), člana 167. Zakona o vodama („Službene novine FBiH“, broj: 70/06) i člana 106. Poslovnika Skupštine Bosansko-podrinjskog kantona Goražde ("Službene novine Bosansko - podrinjskog kantona Goražde", broj: 10/08), na prijedlog Vlade Bosansko-podrinjskog kantona Goražde, Skupština Bosansko-podrinjskog kantona Goražde, na 34.-oj redovnoj sjednici održanoj 01.04.2010.godine,  **d o n o s i**:

## **ZAKON O VODAMA BOSANSKO-PODRINJSKOG KANTONA GORAŽDE**

### **I OSNOVNE ODREDBE**

#### Član 1. Predmet Zakona

(1) Ovim Zakonom uređuje se način upravljanja vodama na području Bosansko-podrinjskog kantona Goražde (u daljem tekstu: Kanton), organizacija i način obavljanja poslova u vezi sa upravljanjem vodama iz nadležnosti Kantona.

(2) Upravljanje vodama obuhvata zaštitu voda, korištenje voda, zaštitu od štetnog djelovanja voda i uređenje vodotoka i drugih voda.

(3) Ovim Zakonom uređuje se vodno dobro i javno vodno dobro, vodni objekti, ovlaštenja i dužnosti kantonalnih i općinskih organa uprave, pravnih i fizičkih lica nadležnih za upravljanje vodama i druga pitanja u vezi sa vodama na području Kantona.

#### Član 2. Svrha Zakona

Svrha ovog Zakona je osiguranje upravljanja vodama s ciljem:

- a) smanjenja zagađenja voda, postizanja dobrog stanja voda i sprečavanja degradacije voda,
- b) postizanja održivog korištenja voda,
- c) osiguranja pravičnog pristupa vodama,
- d) poticanja društvenog i privrednog razvoja,
- e) zaštite ekosistema,
- f) smanjenja rizika od poplava i drugih negativnih uticaja voda,
- g) osiguranja sudjelovanja javnosti u donošenju odluka koje se odnose na vode,
- h) sprečavanja i rješavanja sukoba u pogledu zaštite i korištenja voda i
- i) izgradnje, zaštite, korištenja, održavanja i upravljanja vodnim objektima i druga pitanja iz nadležnosti Kantona.

### **II OPĆA NAČELA I DEFINICIJE**

#### Član 3. Opća načela i definicije

(1) Vode su opće dobro i kao takve su pod posebnom zaštitom Federacije Bosne i Hercegovine ( u daljem tekstu: Federacija), Kantona i općina.

(2) Načela, izrazi i definicije izraza upotrijebljeni u ovom Zakonu imaju isto značenje, kao što imaju osnovna načela i definicije upotrijebljene u članovima 3. i 4. Zakona o vodama ("Službene novine Federacije Bosne i Hercegovine", broj:70/06, u daljem tekstu: federalni Zakon).

(3) Za izraze koji nisu definisani u članu 4. federalnog Zakona primjenjivaće se nazivi izraza i definicije tih izraza regulisane u članu 2. Direktive 2000/60/EC Evropskog parlamenta i Vijeća (u daljem tekstu: Okvirna direktiva o vodama).

### **III POVRŠINSKE VODE, VODNO DOBRO I JAVNO VODNO DOBRO**

#### **Član 4.**

##### **Površinske vode i vodno dobro**

(1) Površinske vode i vodno dobro u nadležnosti Kantona su površinske vode koje su federalnim Zakonom svrstane u vode II kategorije i vodno dobro uz te vode.

(2) Vode I kategorije na području Kantona su vode rijeke Drine, a sve ostale vode na području Kantona su vode II kategorije.

(3) Vodno dobro, u smislu člana 7. federalnog Zakona, može biti u vlasništvu Federacije, Kantona, općine, pravnog ili fizičkog lica.

(4) Određivanje granice vodnog dobra za površinske vode II kategorije organizuje nadležna općinska služba u skladu sa Pravilnikom o načinu određivanja granice vodnog dobra i o postupku utvrđivanja pripadnosti zemljišne čestice javnom vodnom dobru.

(5) Definisanje granice vodnog dobra na terenu vrši se po prethodno urađenom Elaboratu o utvrđivanju granice vodnog dobra odgovarajuće površinske vode za pripadajuće područje općine.

Do izrade Elaborata i definisanja granice vodnog dobra na terenu, postupak određivanja granice vodnog dobra i utvrđivanja pripadnosti zemljišne čestice javnom vodnom dobru, provodiće se po pojedinačnim zahtjevima.

(6) Rješenje o određivanju granice vodnog dobra za površinske vode II kategorije donosi kantonalno ministarstvo nadležno za vode ( u daljem tekstu: ministarstvo) na prijedlog nadležne općinske službe iz stava (4) ovog člana.

(7) Granice vodnog dobra upisuju se u katastarsko-knjižne i zemljišno-knjižne evidencije.

#### **Član 5.**

##### **Javno vodno dobro**

(1) Javno vodno dobro za površinske vode II kategorije je dobro od općeg interesa i u vlasništvu je općine.

(2) Upravljanje javnim vodnim dobrom iz stava (1) ovog člana vrše nadležni organi i pravna lica, u obimu i na način propisan ovim Zakonom ili drugim aktima nadležnog organa kojima je preneseno pravo upravljanja javnim vodnim dobrom.

(3) Rješenjem kantonalnog ministra nadležnog za vode utvrđuje se pripadnost vodnog dobra javnom vodnom dobru za površinske vode II kategorije, u skladu sa Pravilnikom o načinu određivanja granice vodnog dobra i o postupku utvrđivanja pripadnosti zemljišne čestice javnom vodnom dobru.

(4) Javno vodno dobro ne može biti predmet prometa, ali može, pod posebnim uslovima utvrđenim Pravilnikom o načinu i uslovima ograničenog prava korištenja javnog vodnog dobra, biti predmet ograničenog prava korištenja u formi zakupa.

(5) Zemljišna čestica prestaje biti dijelom javnog vodnog dobra pod slijedećim uslovima:

a) ukoliko se rješenjem ministra iz stava (3) ovog člana utvrdi da ta čestica prestaje ispunjavati uslove vodnog dobra iz člana 7. stav (1) federalnog Zakona;

b) donošenjem odluke Vlade Kantona kojom je, na drugi način, za posebne opće potrebe i namjene, određena upotreba tog javnog vodnog dobra.

(6) Status javnog vodnog dobra prestaje datumom upisa promjene statusa u zemljišne knjige na osnovu donesenog rješenja ili odluke iz stava (5) ovog člana.

(7) Javno vodno dobro utvrđeno rješenjem iz stava (3) ovog člana unosi se u katastarsko-knjižne i zemljišno-knjižne evidencije.

## Član 6.

### Zahvati na vodnom dobru za površinske vode II kategorije

- (1) Na vodnom dobru za površinske vode II kategorije nije dozvoljeno izvoditi zahvate, osim:
  - a) gradnje objekata javne infrastrukture (putevi, željeznice, mostovi, plinovodi i sl.),
  - b) gradnje zaštitnih vodnih objekata,
  - c) zahvata koji se odnose na poboljšanje hidromorfoloških i bioloških svojstava površinskih voda,
  - d) zahvata koji se odnose na zaštitu prirode,
  - e) gradnje objekata potrebnih za korištenje voda (objekti za zahvat i akumuliranje vode) i objekata za osiguranje plovidbe i zaštitu od utapanja na prirodnim kupalištima,
  - f) gradnje objekata namijenjenih zaštiti voda od zagađenja,
  - g) gradnje objekata namijenjenih za potrebe rada državnih organa, zaštitu i spašavanje ljudi, životinja ili imovine od prirodnih i drugih nesreća, te provođenje zadataka policije.
- (2) Zahvati iz stava (1) ovog člana podliježu uslovima propisanim zakonom.

## IV VRSTE VODNIH OBJEKATA I VLASNIŠTVO NAD VODNIM OBJEKTIMA

### Član 7.

#### Vodni objekti

Vodni objekti su objekti ili skupovi objekata koji zajedno s pripadajućim uređajima, čine tehničku odnosno tehnološku cjelinu i služe za zaštitu od štetnog djelovanja voda, zahvatanje voda radi njihovog namjenskog korištenja i zaštitu voda od zagađivanja.

### Član 8.

#### Zaštitni vodni objekti

- (1) Zaštitni vodni objekti su: nasipi, obaloutvrde, uređena korita vodotoka, odvodni kanali, obodni (lateralni) kanali za zaštitu od vanjskih voda, odvodni tuneli, brane s akumulacijama, ustave, retenzije i drugi pripadajući objekti, kao i objekti za zaštitu od erozija i bujica.
- (2) Vodni objekti iz stava (1) ovog člana na vodotocima koji pripadaju površinskim vodama II kategorije i uređena korita u urbanim područjima na površinskim vodotocima koji su federalnim Zakonom svrstani u površinske vode I kategorije su u vlasništvu općine.
- (3) Općina može pravo upravljanja i korištenja vodnih objekata iz stava (2) ovog člana prenijeti u nadležnost drugih organa ili pravnih lica, u obimu i na način propisan ovim Zakonom ili aktima općine.
- (4) Općina je dužna da obezbijedi materijalne i organizacione uslove za održavanje objekata iz stava (2) ovog člana u funkcionalnom stanju i da se oni koriste u skladu sa njihovom prirodom i namjenom, kao i čuvanje od uništenja, oštećenja, odnosno nenamjenskog korištenja.
- (5) Općina donosi odluku o načinu korištenja i drugim pitanjima od značaja za održavanje i čuvanje objekata iz stava (2) ovog člana.

### Član 9.

#### Vodni objekti za odvodnjavanje

- (1) Vodni objekti za odvodnjavanje su: osnovna i detaljna odvodna kanalska mreža, crpne stanice za odvodnjavanje i drugi pripadajući objekti.
- (2) Vodni objekti iz stava (1) ovog člana, koji su izgrađeni državnim sredstvima, u vlasništvu su Kantona.
- (3) Pravo upravljanja i korištenja vodnih objekata iz stava (2) ovog člana Kanton može prenijeti na pravna lica.

(4) Vodni objekti iz stava (1) ovog člana, koje su za svoje potrebe izgradila pravna ili fizička lica, u njihovom su vlasništvu i ona brinu o upravljanju tim objektima.

#### Član 10.

##### Vodni objekti za iskorištavanje voda

(1) Vodni objekti za iskorištavanje voda su objekti za:

- a) vodosnabdijevanje (izuzev za opću upotrebu voda) – brane i akumulacije, vodozahvati, bunari, kaptaže s odgovarajućom opremom, postrojenja za prečišćavanje vode za piće, rezervoari i cjevovodi i drugi pripadajući objekti,
- b) snabdijevanje vodom privrednih subjekata – brane i akumulacije, vodozahvati, bunari, kaptaže s odgovarajućom opremom i cjevovodi i drugi pripadajući objekti,
- c) navodnjavanje – brane i akumulacije, dovodni kanali i tuneli, vodozahvatne građevine, crpne stanice, ustave, dovodna i razvodna mreža i drugi pripadajući objekti,
- d) korištenje vodnih snaga – brane i akumulacije, vodozahvati, dovodni i odvodni objekti i drugi pripadajući objekti i oprema,
- e) ostale namjene – objekti za uzgoj riba, rekreacioni bazeni, jezera i dr.

(2) Vodni objekti iz stava (1) tačke b), c) i e) ovog člana, koji su izgrađeni državnim sredstvima, u vlasništvu su Kantona.

(3) Pravo upravljanja i korištenja vodnih objekata iz stava (2) ovog člana, Kanton može prenijeti na pravna lica.

(4) Vodni objekti iz stava (1) tačke b), c) i e) ovog člana, koje su za svoje potrebe izgradila pravna ili fizička lica, u njihovom su vlasništvu i ona brinu o upravljanju tim objektima.

#### Član 11.

##### Kantonalni vodovodi

(1) Vodni objekti iz člana 10. stav (1) tačka a) koji služe za snabdijevanje vodom potrošača na području dvije ili više općina na području Kantona (u daljem tekstu: kantonalni vodovod) su u vlasništvu Kantona, ako nisu u vlasništvu drugih pravnih lica koja su te objekte izgradili za svoje potrebe.

(2) Pod objektima kantonalnog vodovoda u smislu ovog Zakona, smatraju se samo dijelovi tih objekata koji obuhvataju: brane i akumulacije, vodozahvate, bunare, kaptaže sa odgovarajućom opremom, postrojenja za prečišćavanje vode za piće i glavne transportne cjevovode do distribucionih rezervoara općinskih vodovoda i drugi pripadajući objekti.

(3) Vodnim objektima iz stava (1) ovog člana upravlja pravno lice u skladu sa propisima o komunalnoj djelatnosti, kome je Kanton prenio na upravljanje objekte kantonalnog vodovoda.

(4) Korisnici voda iz vodnih objekata iz stava (2) ovog člana su pravna lica iz člana 12. stav (2).

(5) Cijena vode koja se isporučuje iz vodnih objekata kantonalnog vodovoda ne može biti određena ispod iznosa iz kojeg se obezbjeđuju troškovi održavanja i funkcionisanja takvog vodovoda, amortizacija i otplata anuiteta za kredite koji će se obezbijediti za izgradnju tog vodovoda.

(6) Cijena vode koja se potrošačima isporučuje iz vodnih objekata kantonalnog vodovoda će se utvrditi posebnim propisima odnosno aktima kantona.

#### Član 12.

##### Općinski i mjesni vodovodi

(1) Vodni objekti iz člana 10. stav (1) tačka a) za vodosnabdijevanje potrošača na području jedne općine su u vlasništvu općine.

(2) Vodne objekte iz stava (1) ovog člana za vodosnabdijevanje potrošača u općinskim centrima (u daljem tekstu: općinski vodovodi) općina svojom odlukom povjerava na upravljanje i korištenje pravnom licu u skladu sa propisima o komunalnoj djelatnosti.

(3) Vodne objekte iz stava (1) ovog člana za snabdijevanje vodom za piće naselja izvan općinskih centara (u daljem tekstu: mjesni vodovodi), općina svojom odlukom povjerava na upravljanje i korištenje pravnom licu u skladu sa propisima o komunalnoj djelatnosti.

(4) Izuzetno od stava (3) ovog člana, mjesne vodovode koji služe za snabdijevanje vodom za piće manje od 500 stanovnika, općina svojom odlukom može povjeriti na upravljanje i korištenje mjesnoj zajednici.

(5) Općina je dužna da obezbijedi da se iz cijene vode iz vodnih objekata iz stava (1) ovog člana i iz drugih izvora finansiranja, obezbjeđuju troškovi tekućeg i investicionog održavanja vodnih objekata, izdvajanje sredstava za amortizaciju i otplata anuiteta za kredite koji će se koristiti za izgradnju, rekonstrukciju i sanaciju vodovoda, troškove propisanih pregleda zdravstvene ispravnosti vode za piće, te izvršavaju druge obaveze utvrđene ovim Zakonom radi očuvanja života i zdravlja potrošača.

(6) Cijena vode koja se isporučuje potrošačima iz općinskog i mjesnog vodovoda biće utvrđena posebnim propisima odnosno aktima općine.

#### Član 13.

Vodni objekti iz člana 10. stav (1) tačka a) koje su za svoje potrebe izgradila pravna ili fizička lica, u njihovom su vlasništvu i ona brinu o upravljanju tim objektima kao i o zdravstvenoj ispravnosti vode za piće.

#### Član 14.

##### Vodni objekti za korištenje vodnih snaga

Vodni objekti iz člana 10. stav (1) tačka d) u vlasništvu su pravnih ili fizičkih lica koja su izgradila te objekte i koja upravljaju tim objektima, ukoliko drugim zakonom nije drugačije određeno.

#### Član 15.

##### Vodni objekti za zaštitu voda od zagađivanja

(1) Vodni objekti za zaštitu voda od zagađivanja (u daljnjem tekstu: vodni objekti za zaštitu voda) su: kolektori za prijem i transport otpadnih voda, postrojenja za prečišćavanje otpadnih voda, ispusti u prijemnik i drugi pripadajući objekti i oprema.

(2) Vodni objekti iz stava (1) ovog člana u čije objekte ispuštaju otpadne vode privredni subjekti i građani iz dva ili više općinskih centara (u daljnjem tekstu: međuopćinski vodni objekti za zaštitu voda), su u vlasništvu općina, odnosno drugih lica, koja su ih izgradila za svoje potrebe u srazmjeri sa visinom sredstava sa kojima je svaka općina, odnosno drugo lice učestvovalo u izgradnji tih objekata.

(3) Vlasnici vodnih objekata iz stava (2) ovog člana brinu se za njihovu funkcionalnost i tehničku ispravnost.

(4) Općine svojim odlukama povjeravaju na upravljanje i korištenje dio objekata međuopćinskog vodnog objekta za zaštitu voda (postrojenje za prečišćavanje otpadnih voda sa pripadajućim objektima i opremom) pravnom licu koje su za te potrebe osnovale općine u skladu sa propisima o komunalnoj djelatnosti.

(5) Općine su dužne da iz cijene prečišćavanja otpadnih voda međuopćinskog vodnog objekta za zaštitu voda, odnosno iz cijene korištenja kanalizacije koja dovodi otpadne vode na postrojenje za prečišćavanje otpadnih voda i iz drugih izvora finansiranja, obezbijede troškove održavanja međuopćinskog vodnog objekta za zaštitu voda iz stava (2) ovog člana, izdvajanje sredstava potrebnih za amortizaciju tog objekta i otplatu anuiteta za kredite koji će se koristiti za izgradnju, rekonstrukciju i sanaciju tog objekta.

(6) Cijene prečišćavanja otpadnih voda međuopćinskog vodnog objekta za zaštitu voda, odnosno cijene korištenja kanalizacije koja dovodi otpadne vode na postrojenje za prečišćavanje otpadnih voda, će se utvrditi posebnim propisima odnosno aktima općina.

#### Član 16.

##### Općinski i mjesni objekti za zaštitu voda

(1) Vodni objekti iz člana 15. stav (1) u čije objekte ispuštaju otpadne vode privredni subjekti i građani na području jedne općine su u vlasništvu općine.

(2) Vodni objekti iz stava (1) ovog člana u čije objekte ispuštaju otpadne vode privredni subjekti i građani u općinskim centrima su općinski vodni objekti za zaštitu voda.

(3) Općine svojom odlukom povjeravaju na korištenje i upravljanje sve ili dio objekata općinskog vodnog objekta za zaštitu voda iz stava (2) ovog člana, pravnom licu osnovanom za odvođenje otpadnih voda u skladu sa propisima o komunalnoj djelatnosti, ako pravo upravljanja dijelom tih objekata (postrojenje za prečišćavanje otpadnih voda sa pripadajućim objektima i opremom) nije prenijelo drugom pravnom licu.

(4) Vodne objekte iz stava (1) ovog člana u čije objekte ispuštaju otpadne vode privredni subjekti i građani izvan općinskih centara (u daljem tekstu: mjesni vodni objekti za zaštitu voda), općina svojom odlukom povjerava na upravljanje i korištenje pravnom licu u skladu sa propisima o komunalnoj djelatnosti.

(5) Izuzetno od stava (4) ovog člana, mjesne vodne objekte za zaštitu voda za manje od 500 stanovnika, općina svojom odlukom može povjeriti na upravljanje i korištenje mjesnoj zajednici.

(6) Općine su dužne obezbijediti da se iz cijene korištenja kanalizacije i prečišćavanja otpadnih voda iz vodnog objekta za zaštitu voda iz stava (1) ovog člana i iz drugih izvora finansiranja, osiguraju troškovi tekućeg i investicionog održavanja tog objekta, izdvajanje potrebnih sredstava za amortizaciju tog objekta i otplata anuiteta za kredite koji će se koristiti za izgradnju, rekonstrukciju i sanaciju tog objekta.

(7) Cijene prečišćavanja otpadnih voda općinskog i mjesnog vodnog objekta za zaštitu voda, odnosno cijene korištenja kanalizacije koja dovodi otpadne vode na postrojenje za prečišćavanje otpadnih voda, će se utvrditi posebnim propisima odnosno aktima općine.

#### Član 17.

Vodni objekti iz člana 15. stav (1) koje su za svoje potrebe izgradila pravna ili fizička lica, u njihovom su vlasništvu i ona upravljaju tim objektima.

#### Član 18.

##### Višenamjenski vodni objekti

Vodni objekti iz člana 8. stav (1), člana 10. stav (1) i člana 15. stav (1) ovog Zakona mogu imati istovremeno i više namjena – višenamjenski vodni objekti.

#### Član 19.

##### Višenamjenske akumulacije

(1) Višenamjenske akumulacije čija je pretežna namjena snabdijevanje vodom privrede i stanovništva su u vlasništvu Kantona.

(2) Na vodama i obalama vještačkih akumulacija koje su u cjelini ili djelimično u vlasništvu Kantona, zabranjeno je:

- a) korištenje plovila na pogon naftom i naftnim derivatima,
- b) građenje turističkih naselja i kampova,
- c) građenje luka, pristaništa i vezova za čamce,
- d) postavljanje plutajućih objekata u vode višenamjenske akumulacije,
- e) izgradnja objekata za sportske i rekreativne namjene,
- f) građenje privrednih i drugih sličnih objekata,
- g) građenje stambenih i vikend objekata,
- h) kafezni uzgoj riba,
- i) transport tečnosti koje su po svom sastavu opasne za kvalitet voda višenamjenske akumulacije (nafta i naftni derivati, kiselina i dr.), bez odobrenja i pratnje policije,
- j) svaka druga aktivnost koja može negativno uticati na promjene režima voda u višenamjenskoj akumulaciji.

(3) Upravljanje i korištenje objekata višenamjenske akumulacije i voda u akumulaciji, kao i obalno zemljište uz višenamjensku akumulaciju, povjerava se pravnom licu registrovanom za obavljanje te djelatnosti, u skladu sa Zakonom.

#### Član 20.

##### Obala višenamjenske akumulacije

(1) Pod obalom višenamjenske akumulacije iz člana 19. ovog Zakona smatra se pojas zemljišta uz vještačku akumulaciju u širini od 10 metara od linije dopiranja velikih stogodišnjih voda pri koti normalnog radnog nivoa u višenamjenskoj akumulaciji.

(2) Obala vještačke akumulacije služi za održavanje korita višenamjenske akumulacije, pristupa za preduzimanje mjera za saniranje posljedica havarijskog zagađenja voda višenamjenske akumulacije, onemogućavanja pristupa motornih vozila radi sprečavanja zagađenja voda višenamjenske akumulacije i onemogućavanje pristupa građana za korištenje voda višenamjenske akumulacije u skladu sa propisom iz člana 19. stav (4) ovog Zakona.

(3) Obala višenamjenske akumulacije ne može biti predmet prometa i deeksprijacije.

#### Član 21.

##### Obaveze i odgovornosti vlasnika, odnosno korisnika vodnih objekata

(1) Vlasnici, odnosno korisnici vodnih objekata iz članova 8. do 20. ovog Zakona dužni su objekte održavati u funkcionalnom stanju i koristiti ih u skladu sa njihovom prirodom i namjenom.

(2) Vlasnik, odnosno korisnik vodnog objekta iz stava (1) ovog člana dužan je u slučaju prestanka upotrebe tog objekta, postupiti u skladu sa vodnim aktom, odnosno objekat održavati u stanju koje neće prouzrokovati štete režimu voda i trećim licima.

(3) Ako vlasnik, odnosno korisnik ne održava vodni objekat u funkcionalnom stanju i ne koristi ga na način određen u stavovima (1) i (2) ovog člana, kantonalna vodna inspekcija rješenjem nalaže potrebne mjere.

(4) Vlasnik, odnosno korisnik vodnog objekta iz stava (1) ovog člana dužan je vodni objekat održavati i koristiti u skladu sa općim aktom o održavanju, korištenju i osmatranju vodnog objekta i postupanju u slučaju kvara ili havarije na objektu.

(5) Vlasnik, odnosno korisnik vodnog objekta dužan je brinuti o čuvanju vodnih objekata i uređaja na njima od slučajnog ili namjernog oštećenja ili uništenja.

(6) Korisnik vodnih objekata iz člana 8. stav (1) ovog Zakona nije odgovoran za štete trećim licima koje su nastale zbog neizgrađenosti ili nedovoljne osposobljenosti vodnih objekata.

## V UPRAVLJANJE VODAMA

#### Član 22.

##### Upravljanje vodama

(1) Upravljanje vodama čini skup odluka, aktivnosti i mjera čija je svrha održavanje, poboljšanje i ostvarivanje potrebnog i održivog režima voda na određenom prostoru u skladu sa prirodnim uslovima, planom, potrebama i mogućnostima.

(2) Upravljanje vodama iz stava (1) ovog člana ostvaruje se osobito osiguranjem potrebnih količina voda odgovarajućeg kvaliteta za različite namjene, zaštitom voda od zagađivanja, uređenjem voda i vodotoka i zaštitom od štetnog djelovanja voda.

(3) Upravljanje vodama na području Kantona provodi se u skladu sa zakonom i drugim propisima.

#### Član 23.

##### Teritorijalne osnove upravljanja vodama

(1) Osnovna teritorijalna jedinica za upravljanje vodama je vodno područje.



(2) Područje Kantona u cjelini pripada Vodnom području rijeke Save.

(3) Vodno područje rijeke Save obuhvata dio međunarodnoga riječnog bazena Dunava (dio međunarodnog podbazena Save) na teritoriji Bosne i Hercegovine, odnosno na teritoriji Federacije Bosne i Hercegovine.

## VI KORIŠTENJE VODA

### Član 24.

#### Opća upotreba voda

(1) Svakome je dozvoljeno koristiti vodu običnim načinom koji ne zahtijeva posebne naprave i ne isključuje druge od jednakog korištenja vode (opća upotreba vode). Za opću upotrebu voda nije potrebno pribavljati vodne akte propisane ovim Zakonom.

(2) Opća upotreba vode obuhvata naročito:

- a) zahvatanje vode bez posebnih naprava iz vodotoka i jezera za osnovne potrebe jednog domaćinstva;
- b) zahvatanje podzemne vode (bunar na vlastitom zemljištu) ili vode sa izvora na vlastitom zemljištu koja se koristi za osnovne potrebe jednog domaćinstva;
- c) prikupljanje i korištenje oborinskih voda za osnovne potrebe jednog domaćinstva koje se sakupljaju na vlastitom zemljištu;
- d) rekreaciju na vodama.

(3) Osnovnim potrebama domaćinstva iz stava (2) ovog člana smatra se korištenje vode za piće, održavanje čistoće i slične potrebe u domaćinstvu. Takvim korištenjem ne smatra se korištenje vode za navodnjavanje, te korištenje vode u tehnološkom procesu pri obavljanju privredne djelatnosti.

(4) Zabranjeno je koristiti vodu u komercijalne svrhe, bez prethodno pribavljenih saglasnosti, dozvola, odobrenja i drugih akata u skladu sa zakonom.

### Član 25.

#### Pravo na snabdijevanje vodom za piće

(1) Kanton, općina, pravna lica i fizička lica dužni su, svako u okviru svojih prava i obaveza, da odlučuju, provode mjere i aktivnosti kojima će se obezbijediti da svi građani i ostali korisnici voda za piće na području Kantona budu u jednakom položaju kada je u pitanju snabdijevanje vodom za piće, kako u pogledu količine, tako i kvaliteta vode za piće.

(2) Područje Kantona (mjesna zajednica, općina) koje ima dovoljno vode za piće za sadašnje i buduće potrebe utvrđene Planom upravljanja vodama za Vodno područje Save, ne može ometati ili sprečavati druga područja (mjesne zajednice, općine) da se u istoj mjeri snabdijevaju vodom za piće, a koja te vode nemaju ili nemaju dovoljno na svom području.

### Član 26.

#### Prevođenje voda

(1) Rješavanje pitanja snabdijevanja vodom za piće, kada lokalna izvorišta voda ne mogu da zadovolje potrebe za vodom za piće sadašnjih i budućih generacija, vrši se prevođenjem voda sa područja jedne mjesne zajednice na područje dvije ili više mjesnih zajednica i sa područja jedne općine na područje dvije ili više općina.

(2) Prevođenje voda za piće ne može biti osnov za postavljanje oštetnih zahtjeva od strane mjesnih zajednica odnosno općina sa čijeg se područja prevode vode za piće za potrebe drugih mjesnih zajednica ili općina, jer je korištenje voda za piće, kao općeg dobra, jednako pravo svih građana i pravnih lica na području Kantona.

## Član 27.

### Obaveza vođenja evidencije i obezbjeđenja ekološki prihvatljivog protoka

- (1) Pravna i fizička lica koja zahvataju i crpe vodu, osim opće upotrebe vode, dužna su voditi evidenciju o količinama zahvaćene vode i o tome dostavljati podatke nadležnoj agenciji za vodno područje.
- (2) Pravna i fizička lica koja zahvataju i crpe vodu dužna su obezbijediti ekološki prihvatljiv protok koji predstavlja minimalni protok koji osigurava očuvanje prirodne ravnoteže i ekosistema vezanih za vodu.
- (3) Ekološki prihvatljiv protok se utvrđuje u skladu sa članom 62. federalnog Zakona i podzakonskim propisima koji regulišu ovu oblast.

## Član 28.

### Osiguranje zdravstvene ispravnosti vode za piće

- (1) Stalni i sistematski pregled vode i preduzimanje mjera za osiguranje zdravstvene ispravnosti vode za piće i tehničke ispravnosti uređaja, u skladu sa ovim Zakonom i federalnim Zakonom, dužno je osigurati pravno lice koje obavlja djelatnost vodosnabdijevanja.
- (2) Izuzetno od stava (1) ovog člana, stalni i sistematski pregled vode i preduzimanje mjera za osiguranje zdravstvene ispravnosti vode za piće i tehničke ispravnosti uređaja mjesnog vodovoda iz člana 12. stav (4) ovog Zakona, dužna je osigurati mjesna zajednica.

## VII ZAŠTITA VODA

## Član 29.

### Zaštita voda od zagađivanja

- (1) Pravno i fizičko lice može koristiti vodu, ispuštati otpadne vode u površinske vode i vodno dobro ili vršiti druge aktivnosti i zahvate samo uz prethodno pribavljen vodni akt, za koje je ovim Zakonom propisana obaveza pribavljanja vodnog akta i u skladu sa tim vodnim aktom.
- (2) Pravno i fizičko lice dužno je po isteku roka važenja vodne saglasnosti za vađenje materijala dovesti korito i obale vodotoka u stanje predviđeno vodnim aktom.

## Član 30.

### Opća obaveza odvodnje i tretmana otpadnih voda

- (1) Pravno i fizičko lice je dužno otpadnu vodu ispuštati u javni kanalizacioni sistem ili na drugi način, u skladu sa odlukom o odvodnji otpadnih voda, koja obavezno sadrži elemente propisane članom 54. stav (1) i (2) federalnog Zakona.
- (2) Pravna i fizička lica, korisnici kanalizacionog sistema na području Kantona, a koji u obavljanju svoje djelatnosti proizvode opasne i štetne materije za vode, obavezna su da iste prečiste do nivoa koji je u skladu sa propisom iz člana 55. stav (1) federalnog Zakona.
- (3) Odluka iz stava (1) ovog člana sadrži: odredbe o načinu odvodnje otpadnih voda, obavezu priključenja na javni kanalizacioni sistem, uslove i način ispuštanja otpadnih voda na područjima na kojima nije izgrađen takav sistem, obavezu posebnog odlaganja i odstranjivanja opasnih i drugih materija, te obavezu održavanja javnih kanalizacionih sistema.
- (4) Odluku o odvodnji otpadnih voda na području općine donosi općinsko vijeće, ukoliko prijem i transport otpadnih voda čini cjelovit sistem na teritoriji jedne općine.
- (5) Odluku o odvodnji otpadnih voda s područja više općina Kantona, donose općinska vijeća tih općina, svako za područje svoje općine.
- (6) Donosilac odluke o odvodnji otpadnih voda iz stavova (4) i (5) jedan primjerak odluke dostavlja Ministarstvu.

Član 31.  
Septičke jame

- (1) Javne institucije, pravna i fizička lica, vlasnici javnih, stambenih i privrednih objekata kao i vikend kuća koje se grade van naseljenih područja u kojima nije izgrađen vodni objekat za zaštitu voda, dužni su izgraditi nepropusne septičke jame bez preljeva i na iste priključiti javne, stambene i privredne objekte, odnosno vikend kuće i obezbjediti pražnjenje septičkih jama jednom godišnje odnosno prema potrebi, angažovanjem specijalizovanog pravnog lica.
- (2) Pravno lice koje vrši pražnjenje septičkih jama dužno je da ustroji i vodi evidenciju o izvršenom pražnjenju septičkih jama.

Član 32.  
Uvođenje savremenih tehnologija u proizvodnim procesima

- (1) Zabranjuje se uvoz proizvodnih tehnologija koje ne zadovoljavaju standarde Evropske zajednice za očuvanje kvaliteta voda.
- (2) Pravna lica, vlasnici privrednih objekata dužni su preduzimati mjere u cilju zamjene postojećih novim tehnologijama koje zadovoljavaju standarde Evropske zajednice za očuvanje kvaliteta voda.
- (3) Zabranjuje se izgradnja privrednih objekata na području Kantona, bez izgradnje uređaja za prečišćavanje otpadnih voda ili uređaja za smanjenje emisija opasnih i štetnih materija u atmosferu.

Član 33.  
Područja zaštite izvorišta vode za piće

- (1) Područje na kojem se nalazi izvorište vode koje se po količini i kvalitetu može koristiti ili se koristi za javno vodosnabdijevanje mora biti zaštićeno od zagađenja i drugih nepovoljnih uticaja na zdravstvenu ispravnost vode ili izdašnost izvorišta.
- (2) Na područjima iz stava (1) ovog člana provodi se zaštita izvorišta utvrđivanjem zona sanitarne zaštite čija se veličina, granice, sanitarni režim, mjere zaštite i drugi uslovi određuju u skladu sa propisom iz člana 66. stav (3) federalnog Zakona.
- (3) Na osnovu propisa iz prethodnog stava i istražnih radova donosi se odluka o provođenju zaštite izvorišta. Odluka sadrži naročito: granice zona sanitarne zaštite, sanitarne i druge uslove u pojedinim zonama i druge mjere zaštite, zabrane i ograničenja, izvore i način finansiranja za provođenje zaštitnih mjera, nazive organa i pravna lica koja će provoditi odluku, te kazne za povredu odredaba te odluke.
- (4) Zone sanitarne zaštite i zaštitne mjere utvrđuje općinski organ uprave nadležan za vode na čijem području se nalazi izvorište.
- (5) Odluku o zaštiti izvorišta čije se zone sanitarne zaštite prostiru na području jedne općine donosi nadležno općinsko vijeće.
- (6) Odluku o zaštiti izvorišta čije se zone sanitarne zaštite prostiru na području dvije ili više općina u sastavu Kantona, donose općinska vijeća tih općina, svako za područje svoje općine.
- (7) Odluku o zaštiti izvorišta čije se zone sanitarne zaštite prostiru na području Federacije i Republike Srpske, donose sporazumno Vlade Federacije Bosne i Hercegovine i Republike Srpske.
- (8) Odluka o zaštiti izvorišta čije se zone sanitarne zaštite prostiru na području Bosne i Hercegovine i susjedne države mora biti usklađena sa međunarodnim ugovorom koji je potpisala Bosna i Hercegovina.
- (9) Odluke o zaštiti izvorišta iz prethodnih stavova donose se u skladu sa propisom iz člana 66. stav (3) federalnog Zakona.
- (10) Pravna i fizička lica dužna su pridržavati se odluke o zaštiti izvorišta iz prethodnih stavova.
- (11) Donosilac odluke o zaštiti izvorišta iz stavova (5), (6), (7) i (8) jedan primjerak odluke dostavlja Ministarstvu.

## **VIII OGRANIČENJA PRAVA VLASNIKA I KORISNIKA ZEMLJIŠTA**

### **Član 34. Služnosti**

- (1) Za ustanovljavanje prava služnosti radi provođenja ovog Zakona primjenjuju se odredbe Zakona o vlasničko-pravnim odnosima („Službene novine Federacije BiH“, broj: 6/98 i 29/03), te odredbe o služnostima iz propisa o građenju i eksproprijaciji.
- (2) Odredbama članova iz poglavlja X federalnog Zakona definisana su prava, obaveze i ograničenja vlasnika i korisnika zemljišta.

## **IX UREĐENJE VODOTOKA I DRUGIH VODA I ZAŠTITA OD ŠTETNOG DJELOVANJA VODA**

### **Član 35. Obaveze nadležnih nivoa vlasti u osiguravanju uređenja vodotoka i drugih voda**

- (1) Uređenje vodotoka i drugih voda prema ovom Zakonu je održavanje vodotoka i vodnog dobra kao i drugi radovi kojima se omogućava kontrolirani i neškodljivi protok vode.
- (2) Kanton i općina osiguravaju uređenje vodotoka i drugih voda u skladu sa članovima 4. i 5. ovog Zakona, i to u okviru svoje nadležnosti.
- (3) Kanton, općina, pravna i fizička lica osiguravaju izgradnju, rekonstrukciju i održavanje vodnih objekata iz članova 8. do 19. ovog Zakona, i to u okviru svoje nadležnosti, na način propisan ovim Zakonom.

### **Član 36. Zaštita od štetnog djelovanja voda**

- (1) Pod zaštitom od štetnog djelovanja voda podrazumijeva se provođenje aktivnosti i mjera u cilju smanjenja ili sprečavanja ugroženosti ljudi i materijalnih dobara od štetnog djelovanja voda i otklanjanje posljedica njihovog djelovanja.
- (2) Zaštita od štetnog djelovanja voda odnosi se na odbranu od poplava i leda na vodotocima i zaštitu od erozije i bujica.
- (3) Pored zaštite iz stava (2) ovog člana, zaštita od štetnog djelovanja voda obuhvata i mjere zaštite i otklanjanja posljedica prouzrokovanih vanrednim zagađenjem voda.

### **Član 37. Obaveze nadležnih nivoa vlasti u cilju zaštite od štetnog djelovanja voda**

- (1) U cilju zaštite od štetnog djelovanja voda, Kanton i općina, u skladu sa raspoloživim finansijskim sredstvima, na ugroženom području osiguravaju u okviru svoje nadležnosti prema odredbama ovog Zakona, planiranje mjera zaštite, gradnju i upravljanje zaštitnim vodnim objektima, a naročito gradnju nasipa, brana, pregrada, objekata za stabilizaciju dna i obala, objekata za odvođenje unutrašnjih voda i dr.
- (2) Obim zaštite od štetnog djelovanja voda i potrebne mjere određuju se sljedećim planovima: posebnim planovima zaštite od poplava i leda, planovima zaštite od erozije i bujica i planovima zaštite od vanrednog zagađenja voda.
- (3) Planove iz stava (2) ovog člana za površinske vode II kategorije donose Kanton i općina, i to u okviru svoje nadležnosti, prema odredbama ovog Zakona.

Član 38.  
Aktivna odbrana od poplava

- (1) Za vrijeme neposredne opasnosti od pojave velikih (poplavnih) voda, Kanton i općina osiguravaju provođenje mjera aktivne odbrane od poplava, u okviru svojih nadležnosti, prema odredbama ovog Zakona, federalnog Zakona, podzakonskih akata, drugih propisa o zaštiti od prirodnih i drugih nesreća i civilnoj zaštiti.
- (2) Ministar donosi plan o mjerama aktivne odbrane od poplava i načinu njihovog provođenja, za područja uz površinske vode II kategorije na području Kantona.

Član 39.  
Sanacija posljedica štetnog djelovanja voda

- (1) Sanacija posljedica štetnog djelovanja voda se izvodi na osnovu programa sanacije.
- (2) Ako su posljedice štetnog djelovanja voda nastale na vodnom, priobalnom ili drugom zemljištu ili na vodnoj infrastrukturi ili drugom vodnom objektu i uređaju koji je u vlasništvu Kantona, sredstva za njihovu sanaciju osigurava Kanton.
- (3) Ako su posljedice štetnog djelovanja voda nastale na vodnom objektu ili uređaju namijenjenom za posebno korištenje vode i vodnog dobra koji nije u vlasništvu Kantona, njegovu je sanaciju dužan osigurati vlasnik ili operator.
- (4) Ako lice iz stava (3) ovog člana ne osigura sanaciju, a to je značajno za funkcioniranje sistema zaštite od štetnoga djelovanja voda, Ministarstvo sanaciju osigurava na teret tog lica.
- (5) Bez obzira na odredbe stavova (2) do (4) ovog člana, troškove sanacije posljedica vanrednog zagađenja voda snosi pravno i/ili fizičko lice zbog čije je radnje ili propuštanja radnje nastupilo zagađenje.
- (6) Program sanacije iz stava (1) ovog člana za površinske vode II kategorije donosi Vlada Kantona na prijedlog Ministarstva, u roku od šest mjeseci od dana procjene štete i pripreme prijedloga programa sanacije. Procjenu štete i pripremu prijedloga programa sanacije vrši komisija za procjenu štete, u skladu sa ovim Zakonom, federalnim Zakonom i propisima o zaštiti od prirodnih i drugih nesreća.

Član 40.  
Zabrana mijenjanja pravca i količine voda na štetu susjednog zemljišta

- (1) Vlasnik, odnosno korisnik zemljišta ne može na štetu susjednih zemljišta mijenjati pravac ili količinu vode koja prirodno otiče preko njegovog zemljišta ili kroz njegovo zemljište.
- (2) Vlasnik, odnosno korisnik zemljišta iz stava (1) ovog člana dužan je vratiti u pređašnje stanje pravac i količinu vode koju je preusmjerio na štetu susjednog zemljišta.

## **X VODNI AKTI**

Član 41.  
Vrste vodnih akata

- (1) Radi osiguranja upravljanja vodama i osiguranja pravičnog pristupa vodi svim pravnim i fizičkim licima propisuje se način ostvarivanja prava na vodu izdavanjem vodnih akata.
- (2) Vodni akti u smislu ovog Zakona su:
  - a) prethodna vodna saglasnost,
  - b) vodna saglasnost i
  - c) vodna dozvola.
- (3) Vodni akti su upravni akti koje u formi rješenja izdaje Ministarstvo odnosno nadležna općinska služba a protiv rješenja Ministarstva može se izjaviti žalba Vladi Bosansko-podrinjskog kantona Goražde, odnosno protiv rješenja nadležne općinske službe žalba se može izjaviti kantonalnom ministarstvu nadležnom za vode.

## Član 42.

### Podjela nadležnosti izdavanja vodnih akata

- (1) Ministarstvo je nadležno za izdavanje vodnih akata iz člana 41. stav (2) ovog Zakona za:
- a) zahvatanje vode u količini od 2 - 10 litara u sekundi,
  - b) zahvatanje vode u količini do 2 litra u sekundi ukoliko su izvor i potrošači na teritoriji dvije ili više općina,
  - c) ispuštanje otpadnih voda za naselja koja imaju do 2.000 stanovnika,
  - d) vađenje materijala iz površinskih voda II kategorije,
  - e) izgradnju hidroelektrane za proizvodnju električne energije, kada je postrojenje locirano na površinskim vodama II kategorije, snage do 5 MW,
  - f) formiranje akumulacije koja je locirana na površinskim vodama II kategorije i nalazi se na području Kantona,
  - g) izgradnju objekata za zaštitu od poplava na površinskim vodama II kategorije, ako te aktivnosti ne utiču na površinske vode I kategorije,
  - h) izgradnju regionalnih i lokalnih saobraćajnica, uključujući i šumske puteve,
  - i) izgradnju mostova ili drugih objekata iznad ili u površinskim vodama II kategorije,
  - j) uređenje vodotoka na površinskim vodama II kategorije,
  - k) ispuštanje otpadnih voda pojedinačnih javnih, privrednih i drugih objekata koje se vrši putem septičkih jama.
- (2) Općina je nadležna za izdavanje vodnih akata iz člana 41. stav (2) ovog Zakona za:
- a) zahvatanje vode u količini do 2 litra u sekundi,
  - b) građenje ili rekonstrukciju objekata za korištenje vodnih snaga (za pogon strojeva, vodenice, stupe i sl.), osim za proizvodnju električne energije,
  - c) ispuštanje otpadnih voda pojedinačnih stambenih objekata i vikend kuća koje se vrši putem septičkih jama.

## Član 43.

Na vodne akte iz članova 41. i 42. ovog Zakona primjenjuju se odgovarajuće odredbe o vodnim aktima federalnog Zakona i podzakonskih akata donesenih na osnovu federalnog Zakona uz supsidijarnu primjenu Zakona o upravnom postupku („Službene novine FBiH“, broj: 2/98 i 48/99).

## **XI IZGRADNJA, KORIŠTENJE, ZAŠTITA, ODRŽAVANJE I UPRAVLJANJE MJESNIM VODOVODIMA, JAVNIM BUNARIMA I JAVNIM ČESMAMA**

### Član 44.

Odluka o izgradnji, korištenju, zaštiti, održavanju i upravljanju mjesnim vodovodima, javnim bunarima i javnim česmama

- (1) Snabdijevanje vodom za piće u naseljima izvan općinskog centra vrši se u skladu sa odlukom o izgradnji, korištenju, zaštiti, održavanju i upravljanju mjesnim vodovodima, javnim bunarima i javnim česmama.
- (2) Odluka iz stava (1) ovog člana sadrži naročito: odredbe o načinu i uslovima snabdijevanja vodom za piće, načine i uslove izgradnje, zaštite voda, korištenja, dodatnog priključenja, održavanja i upravljanja mjesnim vodovodima, javnim bunarima i javnim česmama na području općine.
- (3) Odluku iz stava (1) ovog člana donosi općina.

Član 45.  
Mjesni vodovod

- (1) Mjesni vodovod je vodni objekat za snabdijevanje vodom za piće naselja izvan općinskog centra koja nisu priključena na jedinstvenu sekundarnu vodovodnu mrežu općinskog vodovoda.
- (2) Pod mjesnim vodovodom iz stava (1) ovog člana smatra se i vodni objekat za snabdijevanje vodom za piće vikend naselja.
- (3) Upravljanje i korištenje mjesnih vodovoda iz stavova (1) i (2) vršit će se na način propisan članom 12. stavovi (3) i (4) ovog Zakona.

Član 46.  
Javni bunar i javna česma

- (1) Javni bunar je vodni objekat za snabdijevanje vodom za piće sa odgovarajućom zaštitnom zonom i odgovarajućim uređajima, koji služi za snabdijevanje vodom za piće najmanje dva domaćinstva.
- (2) Javna česma je vodni objekat za snabdijevanje vodom za piće sa odgovarajućom zaštitnom zonom i odgovarajućim uređajima koji služi za snabdijevanje vodom za piće stanovnika naselja izvan općinskog centra i prolaznika.
- (3) Javna česma može biti izgrađena i na području općinskog centra kao i van naseljenih mjesta (spomen ili hair česme).

Član 47.  
Snabdijevanje vodom za piće

- (1) Izvorišta voda koja se zahvataju radi snabdijevanja vodom za piće naselja izvan općinskog centra putem mjesnih vodovoda moraju imati dovoljne količine zdravstveno ispravne vode za piće, kako bi se u svako doba godine moglo obezbijediti neprekidno snabdijevanje vodom stanovnika naselja izvan općinskog centra.
- (2) Kaptaza i rezervoari koji su u smislu ovog Zakona sastavni dio mjesnog vodovoda, a koji služe za prihvatanje i akumuliranje vode za piće, moraju imati propisne izolacije i ostale potrebne uređaje.
- (3) Kapacitet rezervoara mjesnog vodovoda treba da obezbijedi dovoljnu količinu vode za dnevnu potrošnju korisnika i rezervu za gašenje požara.
- (4) Mjesni vodovod mora imati ugrađen i propisno baždaren uređaj za mjerenje količina iskorištene vode na odvodu iz rezervoara, a ako ima više odvoda iz rezervoara, na svakom odvodu.
- (5) Ako je kapacitet izvorišta veći od stvarnih potreba korisnika mjesnog vodovoda, na rezervoaru tog mjesnog vodovoda može se ugraditi česma sa betonskim koritom za javnu upotrebu (javna česma).

Član 48.  
Investitori za izgradnju mjesnog vodovoda

Investitor za izgradnju mjesnog vodovoda može biti općina, mjesna zajednica ili grupa građana.

Član 49.  
Dokumenti potrebni za izgradnju mjesnog vodovoda

- (1) Izgradnja mjesnog vodovoda vrši se na osnovu izdatog odobrenja za građenje po propisima o prostornom uređenju odnosno građenju, uz prethodno pribavljanje vodne saglasnosti.
- (2) Vodna saglasnost za građenje mjesnog vodovoda iz stava (1) ovog člana izdaje se na osnovu prethodno izdate urbanističke saglasnosti, koja se izdaje nakon pribavljene prethodne vodne saglasnosti.
- (3) Vodna saglasnost iz stava (1) ovog člana izdaje se u skladu sa odredbama federalnog Zakona i Pravilnika o sadržaju, obliku, uvjetima, načinu izdavanja i čuvanja vodnih akata.

#### Član 50.

##### Vodna dozvola za mjesni vodovod

(1) Po izvršenoj izgradnji ili rekonstrukciji mjesnog vodovoda ili javnog bunara, a prije izdavanja odobrenja za upotrebu po propisima o prostornom uređenju odnosno građenju, pribavlja se vodna dozvola.

(2) Uz zahtjev za izdavanje vodne dozvole za mjesni vodovod dostavlja se dokumentacija propisana odredbama federalnog Zakona i Pravilnika o sadržaju, obliku, uvjetima, načinu izdavanja i čuvanja vodnih akata.

#### Član 51.

##### Zaštita izvorišta mjesnih vodovoda i javnih bunara

Zaštita izvorišta mjesnih vodovoda i javnih bunara vrši se u skladu sa članom 33. ovog Zakona.

#### Član 52.

##### Zabranjene aktivnosti na objektima mjesnog vodovoda i javnog bunara

Zabranjeno je neovlaštenim licima da vrše otvaranje i zatvaranje vodovodnih armatura, instalacija, hidranata i ostalih uređaja mjesnih vodovoda i javnih bunara, izuzev u slučaju kada je to nužno u cilju sprječavanja šteta većih razmjera (pucanje cijevi, požara i slično).

#### Član 53.

##### Zabranjene aktivnosti na javnim bunarima i javnim česmama

Zabranjeno je na javnim bunarima i javnim česmama pranje rublja, kupanje, napajanje stoke, pranje motornih i drugih vozila, što bi moglo ugroziti zdravstvenu ispravnost vode za piće, odnosno oštećenje instalacija i uređaja javnih bunara i javnih česmi.

#### Član 54.

##### Održavanje javnih česmi i javnih bunara

O održavanju javnih česmi i javnih bunara brinu se investitori izgradnje ili općine, ukoliko su dale saglasnost za njihovu izgradnju.

#### Član 55.

##### Evidencija o mjesnim vodovodima, javnim bunarima i javnim česmama

(1) Općinska uprava dužna je da ustroji i vodi evidenciju o mjesnim vodovodima, javnim bunarima i javnim česmama i da blagovremeno registruje sve promjene od značaja za ove objekte.

(2) U evidenciji iz stava (1) ovog člana unose se naročito podaci o:

- a) nazivu mjesnog vodovoda, odnosno javnog bunara i javne česme,
- b) mjesnoj zajednici,
- c) broju i datumu izdavanja prethodne vodne saglasnosti,
- d) broju i datumu izdavanja urbanističke saglasnosti,
- e) broju i datumu izdavanja vodne saglasnosti,
- f) broju i datumu izdavanja odobrenja za građenje,
- g) broju i datumu izdavanja vodne dozvole,
- h) broju i datumu izdavanja upotrebne dozvole,
- i) broju i datumu izdavanja sanitarne saglasnosti,
- j) broju domaćinstava koja koriste mjesni vodovod, odnosno javni bunar,
- k) broju naknadno priključenih domaćinstava na mjesni vodovod.



## **XII FINANSIRANJE**

### **Član 56. Izvori sredstava**

Poslovi koji su, prema odredbama federalnog Zakona i ovog Zakona, stavljeni u nadležnost Kantona i općina, finansiraju se iz:

- a) dijela sredstava prikupljenih po osnovu vodnih naknada i zakupa javnog vodnog dobra na površinskim vodama I kategorije, koja po članu 177. stav (1) tačka 2. federalnog Zakona pripadaju Kantonu,
- b) prihoda po osnovu zakupa javnog vodnog dobra na površinskim vodama II kategorije,
- c) budžeta Kantona i budžeta općina,
- d) kreditnih sredstava,
- e) sredstava osiguranih posebnim zakonom,
- f) donacija i ostalih sredstava u skladu sa zakonom.

### **Član 57. Korištenje sredstava**

Sredstva iz člana 56. ovog Zakona koriste se za:

- a) finansiranje poslova iz člana 58. stav (1) ovog Zakona,
- b) sufinansiranje izgradnje i održavanja vodnih objekata iz člana 14. stav 1. federalnog Zakona, osim objekata iz tačke 3. alineje 2., 4., 5. i 6. tog člana,
- c) ostale aktivnosti vezane za poslove upravljanja vodama (izrada tehničke dokumentacije, podloga za izdavanje koncesija i dr.) u skladu sa godišnjim planom i programom utroška ovih sredstava, koji na prijedlog Ministarstva donosi Vlada Kantona.

### **Član 58. Poslovi Ministarstva u vezi sa korištenjem sredstava**

- (1) Ministarstvo obavlja poslove u vezi sa korištenjem sredstava utvrđenih ovim Zakonom, a naročito:
  - a) izrade godišnjeg plana i programa za realizaciju aktivnosti iz člana 57. ovog Zakona,
  - b) organizacije vršenja poslova na izvršavanju programa iz tačke a) ovog člana,
  - c) organizacije istražnih radova, izrade investiciono-tehničke i druge dokumentacije i vršenja revizije te dokumentacije,
  - d) vršenja investicionih poslova i supervizor nad namjenskim utroškom sredstava za izgradnju vodnih objekata prema programu ulaganja sredstava vodnih naknada,
  - e) planiranja i prikupljanje sredstava za finansiranje poslova iz programa sredstava vodnih naknada,
  - f) saradnje sa općinama, privrednim društvima i drugim pravnim licima na području Kantona,
  - g) saradnje sa Agencijom za vodno područje rijeke Save u izradi plana upravljanja vodama za područje Kantona,
  - h) i druge poslove.
- (2) Ministarstvo je dužno da osigurava racionalno korištenje sredstava koja su obezbijedena za obavljanje poslova u skladu sa ovim Zakonom.

### **XIII NADZOR**

#### **Član 59. Upravni nadzor**

- (1) Ministarstvo vrši upravni nadzor nad provođenjem ovog Zakona i propisa donesenih na osnovu ovog Zakona.
- (2) Općina vrši upravni nadzor nad provođenjem propisa koje donosi na osnovu ovog Zakona, a u okviru svoje nadležnosti.

#### **Član 60. Nadzor zdravstvene ispravnosti vode za piće**

- (1) Kvalitet vode koja se koristi za piće (vodosnabdijevanje) mora odgovarati uslovima utvrđenim propisom o kvalitetu vode za piće koji donosi federalni ministar nadležan za zdravstvo.
- (2) Pravno lice koje obavlja djelatnost vodosnabdijevanja dužno je osigurati stalni i sistematski pregled vode i preduzimati mjere za osiguranje zdravstvene ispravnosti vode za piće i tehničke ispravnosti uređaja, u skladu sa propisom iz stava (1) ovog člana.
- (3) Kontrolu vode za potrebe snabdijevanja vode za piće može vršiti samo ovlaštena laboratorija koja ispunjava uslove koje propisuje federalni ministar nadležan za zdravstvo.

#### **Član 61. Inspekcijski nadzor**

Inspekcijski nadzor nad provođenjem ovog Zakona i propisa donesenih na osnovu ovog Zakona vrši Kantonalna uprava za inspekcijske poslove, putem kantonalnih vodnih inspektora.

#### **Član 62. Inspekcijski postupci**

- (1) Kada utvrdi da postoji povreda ovog Zakona, propisa ili drugih akata donesenih na osnovu ovog Zakona, kantonalni vodni inspektor u zapisniku konstatuje nepravilnost ili nedostatak i rješenjem nalaže mjere i rok za njihovo otklanjanje.
- (2) Pored ovlaštenja i dužnosti utvrđenih zakonom, u slučaju iz stava (1) ovog člana, kantonalni vodni inspektor ovlašten je i dužan:
  - a) narediti obustavljanje izvođenja radova, ako se vrše protivno vodnom aktu ili se vrše bez vodnog akta, a propisana je obaveza njegovog pribavljanja,
  - b) narediti, u saradnji sa građevinsko-urbanističkom inspekcijom, uklanjanje sagrađenog objekta ili postrojenja izgrađenog bez vodnog akta, ako u roku od 60 dana nije pribavljen vodni akt,
  - c) narediti privremenu obustavu rada, odnosno obavljanje djelatnosti pravnog lica ili njegovog dijela, ako utvrdi da otpadne vode sadrže opasne materije u količini većoj od dozvoljene ili se zahvataju veće količine vode od dozvoljenih,
  - d) zabraniti preduzimanje radnji koje nisu dozvoljene ovim Zakonom.

#### **Član 63. Žalba na rješenje vodnog inspektora**

- (1) Protiv rješenja kantonalnog vodnog inspektora, koje je doneseno na osnovu ovog Zakona i propisa donesenih na osnovu ovog Zakona, žalba se izjavljuje Ministarstvu, putem Kantonalne uprave za inspekcijske poslove.
- (2) Žalba protiv rješenja kantonalnog vodnog inspektora odlaže izvršenje rješenja, osim u slučajevima utvrđenim federalnim Zakonom i drugim zakonom kada se donosi pisano ili usmeno rješenje i odmah naređuje njegovo izvršenje bez odlaganja.

## XIV KAZNENE ODREDBE

### Član 64. Prekršaji

(1) Novčanom kaznom u iznosu od 2.000,00 KM do 15.000,00 KM kažnjava se za prekršaj pravno lice ako:

- a) postupa suprotno odredbama člana 6.,
- b) postupa suprotno odredbama člana 19. stav (2),
- c) ne održava u funkcionalnom stanju i ne koristi vodne objekte u skladu sa njihovom prirodom i namjenom (član 21. stav (1)),
- d) u slučaju prestanka upotrebe vodnog objekta ne postupi u skladu sa vodnim aktom, odnosno ne održava objekat u stanju koje neće prouzrokovati štete režimu voda i trećim licima (član 21. stav (2)),
- e) ne brine o čuvanju vodnih objekata i uređaja na njima od slučajnog ili namjernog oštećenja ili uništenja (član 21. stav (5)),
- f) postupa suprotno odredbi člana 24. stav (4),
- g) ne osigura stalni i sistematski pregled vode i ne poduzme mjere za osiguranje zdravstvene ispravnosti vode za piće i tehničke ispravnosti uređaja (član 28. stavovi (1) i (2)),
- h) postupa suprotno odredbama člana 29.,
- i) postupa suprotno odredbi člana 30. stav (1),
- j) postupa suprotno odredbi člana 31.,
- k) postupa suprotno odredbama člana 32.,
- l) postupa suprotno odredbi člana 33. stav (10),
- m) postupa suprotno odredbama člana 40.,
- n) postupa suprotno odredbi člana 52.,
- o) postupa suprotno odredbi člana 53.,
- p) ne postupi po rješenju vodnog inspektora iz člana 62. stav (1),
- q) ne podnese zahtjev za izdavanje nove vodne dozvole u propisanom roku iz člana 69. stav (1),
- r) ne podnese zahtjev za izdavanje vodne dozvole u propisanom roku iz člana 70.,
- s) ne izgradi nepropusnu septičku jamu i na istu ne priključi javni, stambeni ili privredni objekat u roku iz člana 72.

(2) Za prekršaj iz stava (1) ovog člana kažnjava se i odgovorno lice u pravnom licu novčanom kaznom u iznosu od 400,00 KM do 3.000,00 KM.

### Član 65.

(1) Novčanom kaznom u iznosu od 1.000,00 KM do 7.500,00 KM kažnjava se za prekršaj pravno lice ako ne vodi evidenciju o količinama zahvaćene vode i o tome ne dostavlja podatke nadležnoj agenciji za vode (član 27.),

(2) Za prekršaj iz stava (1) ovog člana kažnjava se i odgovorno lice u pravnom licu novčanom kaznom u iznosu od 300,00 KM do 2.000,00 KM.

(3) Za prekršaj iz stava (1) kažnjava se fizičko lice novčanom kaznom u iznosu od 200,00 KM do 1.000,00 KM.

### Član 66.

Novčanom kaznom u iznosu od 200,00 KM do 1.500,00 KM kažnjava se za prekršaj fizičko lice ako:

- a) postupa suprotno odredbama člana 6.,
- b) postupa suprotno odredbama člana 19. stav (2),
- c) ne održava u funkcionalnom stanju i ne koristi vodne objekte u skladu sa njihovom prirodom i namjenom (član 21. stav (1)),
- d) u slučaju prestanka upotrebe vodnog objekta ne postupi u skladu sa vodnim aktom, odnosno ne održava objekat u stanju koje neće prouzrokovati štete režimu voda i trećim licima (član 21. stav (2)),

- e) ne brine o čuvanju vodnih objekata i uređaja na njima od slučajnog ili namjernog oštećenja ili uništenja (član 21. stav (5)),
- f) postupa suprotno odredbi člana 24. stav (4),
- g) postupa suprotno odredbama člana 29.,
- h) postupa suprotno odredbi iz člana 30. stav (1),
- i) postupa suprotno odredbi člana 31.,
- j) postupa suprotno odredbi člana 33. stav (10),
- k) na štetu susjednog zemljišta mijenja pravac ili jačinu vode koja prirodno otiče član 40. stavovi (1) i (2),
- l) postupa suprotno odredbi člana 52.,
- m) postupa suprotno odredbi iz člana 53.,
- n) ne postupi po rješenju vodnog inspektora iz člana 62. stav (1),
- o) ne podnese zahtjev za izdavanje nove vodne dozvole u propisanom roku iz člana 69. stav (1),
- p) ne podnese zahtjev za izdavanje vodne dozvole u propisanom roku iz člana 70.,
- q) ne izgradi nepropusnu septičku jamu i na istu ne priključi stambeni ili privredni objekat u roku iz člana 72.

## **XV PRELAZNE I ZAVRŠNE ODREDBE**

### **Član 67.**

#### **Planski dokumenti**

Do donošenja Plana upravljanja vodama za vodno područje Save, kao planski dokumenti za upravljanje vodama u Kantonu, koristit će se odgovarajući planovi i programi razvoja vodoprivrede i pojedinih oblasti vodoprivrede (zaštita od štetnog djelovanja voda, zaštita voda i korištenje voda), doneseni do dana stupanja na snagu ovog Zakona.

### **Član 68.**

#### **Ranije izdati vodoprivredni akti**

- (1) Vodoprivredne dozvole koje su izdate u skladu sa Zakonom o vodama ("Službene novine Federacije BiH", broj 18/98) i propisima donesenim na osnovu ovog zakona, usaglasit će se s odredbama ovog Zakona, u roku do pet godina od dana stupanja na snagu ovog Zakona..
- (2) Nosioци prava iz vodoprivrednog akta iz stava (1) ovog člana dužni su podnijeti zahtjev za preispitivanje vodne dozvole, u roku do dvije godine od dana stupanja na snagu ovog Zakona.
- (3) U slučaju da zahtjev iz stava (2) ovog člana nije podnesen u roku iz stava (2) ovog člana, vodoprivredni akt iz stava (1) ovog člana prestaje da važi.
- (4) Odredbe iz stava (1) ovog člana ne odnose se na vodoprivredne dozvole koje važe pet godina ili manje.

### **Član 69.**

#### **Postojeći objekti i aktivnosti za koje nije izdat vodni akt**

- (1) Vlasnici, odnosno korisnici postojećih objekata i postrojenja koji iskorištavaju vode ili ispuštaju otpadne vode i druge opasne i štetne materije u vode, za koje nije pribavljena vodna dozvola do dana stupanja na snagu ovog Zakona, dužni su da podnesu zahtjev za izdavanje vodne dozvole u roku od godinu dana od dana stupanja na snagu ovog Zakona.
- (2) U slučaju da zahtjev iz stava (1) ovog člana nije podnesen u predviđenom roku, rješenjem kantonalne vodne inspekcije zabranit će se upotreba objekata odnosno postrojenja iz stava (1) ovog člana.

Član 70.

Rok pribavljanja vodne dozvole za postojeće mjesne vodovode

Vlasnici postojećih mjesnih vodovoda dužni su da za iste, u roku od dvije godine od dana stupanja na snagu ovog Zakona, pribave vodnu dozvolu.

Član 71.

Rok za uspostavu evidencije o mjesnim vodovodima, javnim bunarima i javnim česmama

Općina je dužna najkasnije u roku od dvije godine od dana stupanja na snagu ovog Zakona ustrojiti evidenciju o mjesnim vodovodima, javnim bunarima i javnim česmama (član 55).

Član 72.

Rok za izgradnju septičkih jama za postojeće objekte

Javne institucije, pravna i fizička lica, vlasnici javnih, stambenih i privrednih objekata, kao i vikend kuća, koje su podignute van naseljenih mjesta prije stupanja na snagu ovog Zakona dužni su da izgrade nepropusne septičke jame i na iste priključe javne, stambene i privredne objekte odnosno vikend kuće u roku od tri godine od dana stupanja na snagu ovog Zakona.

Član 73.

Rok za donošenje odluka općina

Odluke općina u skladu sa odredbama ovog Zakona donijet će se u roku od dvije godine od dana stupanja na snagu ovog Zakona.

Član 74.

Stupanje na snagu i početak primjene

- (1) Pored odredaba ovog Zakona shodno će se primjenjivati i odredbe federalnog Zakona i podzakonskih propisa donešenih na osnovu federalnog Zakona.
- (2) Radi lakše primjene određenih zakonskih rješenja nadležni kantonalni organi mogu donijeti podzakonske akte kojima će detaljnije regulisati određena pitanja.
- (3) Ovaj Zakon stupa na snagu osmoga dana od dana objavljivanja u "Službenim novinama Bosansko-podrinjskog kantona Goražde".

**Broj: 01-02-249/10**  
**02.04.2010. godine**  
**G o r a ž d e**

**PREDSJEDAVAJUĆI SKUPŠTINE**  
**dr. Alija Begović**